

寶雲詩集

寶雲詩集卷六

挂瓢集

漏霜南潛著

挂瓢詩

癸亥秋記十年挂瓢之地也其地爲石屏爲玉椒爲東石澗爲青山常紹爲東湖寺爲紫石路陳所歷詩四十餘首存十二

紙窗補學稻田衣撲火宵攻巧破圍枉了秋蟲妬書卷
老來眼力怯秋輝

打翻筆陣別生奇書法須他老樹知道是山僧愛枯筆
倒穿石眼放危枝

相瓢相鶴一般評我相枯筇部位清
合共孤雲浪此生

高松落落澗潺潺鏡面盤陀坐怕還依稀二十年前景
南嶽跟師過後山

隨身起箇挂瓢堂沒底衣囊沒底箱箱裏完全游藁在
石屏前段是浮湘

要徵僧寶未成編碑版懸心幾十年葉脫微紅知殿角
去看殘碣寺門前

篾屋彎環短冊齊雞聲山寺點秋谿船窗只把東邊開
潑黛峰巒總在西

碧森拔地密如環松檜堆青縹緲間轉換山林一奇絕
山如林立樹如山

竹橋滑滑笠胎輕雨隔樵村黯澹生松聲作鬧引人去

小鳥前頭忽報晴

谿堂收得竟陵書怕我匡廬信又虛不讓旣閑頭獨白
定來其上看山興

自題挂瓢詩

忘疾生成老更忘雲山恕我筆疏狂好山無數忘無數
乍上心來便寫將

帚忘

高賢宗少文畫格亦清絕壁閒圖所歷忍與名山訣臥
游身旣良入夢皆芳潔唐司空表聖詩人高氣節分畫
古烈士滿壁飛秋雪吾欲畫名山名山非故轍吾欲畫
古賢古賢誰與埒置畫亦無處尋山游未決江湖作四

壁繪之以談說吐奇天地間凜凜不能滅

五人以爲伍伍各守所知所知亦不遠咫尺非所移部
伍有古法不遷以爲師耳目與心志專一禁紛歧此理
達朝野方外有清規一以御其眾補職量高卑眾各守
其一分面視旌麾吾聞至人訓樞中握其奇羣賢定有
分鉅人無所宜

昔者陸放翁朝路得遐契同舍二三君連鑣卽松桂寂
寥太乙宮無人花滿地古松流水間負琴一丫髻相謂
風致高吾輩慚空詣揖而前問之絕倒蒼苔砌高士往
獻香上官生日計嗟哉渭南文述此憂非細

客來挂罾浦不見捕魚郎金鱗躍其中顧之心惻傷

魚轉復思無乃漁事妨枯魚幸滿船投一足以償漁來
得枯魚驚絕傳蒼黃一時開野廟祀作枯魚王彼客迴
棹過大笑破神荒枯魚客自挂疑決不思量馬不驚其
影此事好推詳

動植各有分稱名浩難稽鳳尾字之鳳雞冠以爲雞玉
簪以爲玉銀杏金石齊蛇何以有牀躑躅記羊躑紛紜
視籬落未易剖端倪一悟聲輪妄青霄躡有梯

飛來白玉盤指之以爲月小兒不知名此語安可闕語
有重丘山亦或輕毫忽疊語駕重樓無事而旗揭脫示
高山冠謂能藏白髮譽草春日青歎雲之無骨入耳笑
疾增絡繹何時竭

宋朝梅聖俞著書足傳錄有唐載一種爲卷二十六世上豔詩名拾錦而棄菽新舊兩書行唐載誰能讀古來文章傑立言貴其獨安能必世知浩氣收山麓

晉愷和殿中玉等等羣玉玉色次第排高下如燒燭以等等比之前定千秋目宗風分盛衰宋後鑑誰續北宋爲甲等南渡初乙錄宋末至於元丙等傷局促丁起前甲子諸老垂簡牘未必後遜前今古互迴復因革與損益發揮要沈篤法頂不懸示語必憂其瀆四部爲宗等後哲思應熟

書狀在侍寮法王之內史吾欲嚴其職記事言於紙某年某月日細大表終始要存百世下公非與公是其文

貴簡切不許近浮綺此職能力行庶其遵古軌

聖道憂無傳六經不妨續王通亦何罪宋人苦加辱立
言浩無私漁樵語堪錄以筆舌爲市罪乃不可贖方內
外著書少直多循曲老眼況昏花不如殘卷束

浙有小兒醫知近亦知遠視兒瘡黯然絕歎治之晚失
在五日前養禍不能偃尙歷百晝夜刻期魂不返所以
養禍者凝神少關鍵當其發越時忘守其根本以本爲
末用渙汗難復卷已至所刻期醫來相對飯哭聲出自
內奔車敗難輓書以告禪林發藥憂其反

唐刺史賈順一言能近道未聞世良醫能治人之老然
有治老法傳方苦不早掌上撮山河打合池塘草寓目

物無故生機來浩浩白頭果如新寒山青不天

名器不可假正名非計迂千秋下僧史失核慮將誣禪
林浪稱謂頗亂魚目珠或隆名大師紫柏清涼俱或同
門手度子姪汎以呼名山主法人直心不貴諛先師昔
憂世宗禮要親扶此書編未及觸事淚沾濡

文穆夾袋冊溫公薦士編甲乙丙丁集韓忠獻以傳禪
林作輔粥愛土看前賢袖中須一卷衲子名細箋箋長
簡所短揚抑見微權禪林之大要得人以爲先不見陳
蒲鞋手開濟上天

宗風日以下滔滔逝百川挽之不在地挽之不在天挽
在衲子心心開氣候先古來建法社舍此無異緣世衰

薄英傑自養不養賢憶先師有言衲子爲我田名山事
凋落幾時得豐年

香至國王子禪宗之古俠崎嶇累萬里非關行路捷孤
遊開震旦一埽浮雲牒大功寧望報葬骨不肯貼一以
酬師恩一以傳後葉

柳州山水訣一曠而一奧吾添一韻字韻高方境到山
水曠無韻平沙同浩浩若奧而不韻塞抑安足蹈韻從
無意來緣澹而氣導政如謝安語調暢身所好
有人蓑笠至肩上著魚叉分明是漁者足印峰頂沙遇
之愕不已言君投步差樵父熟樵斧田舍晏桑麻山頭
足雲松安得魚與鰕所以駭未見皆由聞見遮

揚雄卒元始何曾葬大夫文中子立言僞書之所無書
雄葬大夫宋儒聞見拘謂文中僞書吹毛索其辜文章
有真氣道術非暗途後有萬世人穿鑿空自愚

舉峰明覺堂西軒有三醉芙蓉曉素午淡紅漸
晚紅漸深

換眼庭花別指呈芙蓉好替牡丹名曉風殘月柳三變
冷落繁華夢五更共喜朱顏忘是醉相當西嶺夜來晴
低頭感慨人間世幾個驪珠辨得清

準提鏡歌

舉峰所藏
唐鏡也

梅影軒中準提鏡神臂擎空無鈕柄鏡背仍傳艮背形
面入光明纔是正一輪雲簇梵天文點額珠光噤字迸

大乘氣象掩不得震旦唐翻筆清硬西天此土一合璧
顛倒縱橫誰道病吾觀鏡隸定唐賢漢尙分體六代妍
三千歲事浮雲影看鑄神光是幾年

爲椒兄作堯峰洗石歌

堯峰不改堯時碧白龍飛去山開闢我曾灑埽役山門
洗石無成心內責匏翁曾孫南岳子天荒地老煙霞癖
一時難袖補天手自舀靈泉洗靈石寶雲井上結樓閣
是石是雲誰實核洗來片片青鳳青捉住怕矯秋風翻
不嫌飛去騁神奇白頭兄弟須吟席

確兄過舉峰問病作詩謝并及著書之約

漏雲日射堯峰背訪病肩輿寂寞身話到古人同下淚

始知法苑重天倫錄鈔舊本尋南宋義取垂箴指北辰
顧命乍提僧寶字爭教石硯放生塵

題朗道人山亭短幅

龍嘴遊回菊花節大鑑堂前畫同閱吳郡醫王朗仲氏
入門齒屐懽幾折低頭就觀忽遠立躍起手指迴複說
是時正展秋崖圖石門手筆籤明揭仲云前輩風格好
起伏照應藏波謫畫心亦復似文心名山大川天造設
近來墨痕溝壑斷血騰脈距神先絕自言論畫得家學
兄朗道人親授訣此幅山亭道人筆往事回頭動哀切
仲亦能爲潑墨山問道先師人似雪堯峰塔樹十迴青
腸斷秋湖鴻影滅

山行

殿角楓林一等紅射來西照斷崖中秋山著色老僧澹
水墨衣飄落葉風

古堯峰壽聖寺起超然堂於冬青軒上從土中
古屋陟得紹聖舊錢

聖恩鄭重識宗傳克紹端能起後賢分明表出禪林盛
北宋風規紹聖錢
蝕礎苔磚歲月遷冬青古曲忍輕傳堂堂聖宋威儀在
南渡前頭舊紀年

堯峰柏

堯峰三古柏其一作草字左紐忽橫枝枯身側青翹其

一崖石腳插江神太悴小簇苔花偏亦復秋嫵媚其一
獨翩然蒼潤能深致迴頭語其儔歲寒曾不異

往余兩至南麻寺一癸卯華山僧兄初住南麻
時一先師甲辰至而來見也癸亥十月寓鉢囊
寺中感舊慨然

漁鄉僻藏寺重至已衰年遠葦足秋雪平林養曉煙論
交殘卷在舊夢畫圖傳浩蕩鷗波濶終思船子賢

南麻東橋引

居人言南麻地形
如一片蓮葉淨也

翦來華山頂上一片圓荷葉皺綠堆青幾迴摺車輪花
瓣作江霞湧出花宮紅狎獵荷花倚葉葉有莖碧倚小
塘池草接雙橋玲瓏串煙樹清鐘敲霜寒玉貼

村居詩

撲曉霜花透髮根
雁天風景向誰論
空樓只有孤雲宿
禿樹寒鴉與守門

浮綠眞成一彈丸
四圍似欠石欄干
卻把蘆花當籬落
晴欄堆裏葉聲乾

遠水平鋪一幅紗
斜陽射處點漁家
喧喧鬪雀輸贏後
緩蹋樓頭啄瓦花

蕭疏澹墨舊名垂
著色雲林更一奇
淺紺水村紅殿角
夕陽烘染柳風吹

寒雲停宿曉登藏閣迎雪

空樓花雨舊心盟
老眼拋書試一行
瘦骨已無山作對

寒姿會有雪堪迎不應同調猶千里未審飛來更幾程
尋著蓑衣連夜補明朝獨釣最關情

石堆

石堆荒圃支離相匏繫枯枝跌宕聲惟有澹黃寒日色
一條射得亂書明

華山兄夜至

打冰來就歲寒期夢裏梅花預折枝

昨夢僧兄手
梅花折枝

論定

法門垂令甲談深出戶見參旗春回燭影茶聲外句得
香消研凍時藕葉中閒樓閣冷夜闌相對髮如絲

南麻
村浮

水中央如
藕葉也

載書船返得夕香霜樵書

短燭山窗白事賤病餘瑣事足清緣埽除塵土間酬接
補住煙波一釣船舉古無如山鳥當論交最是野樵賢
歲寒莫怨雲山隔同在冰花雪葉天

雞聲

疊樹層煙當曉籌五更清喚荻花洲忽驚天地還朝氣
可信英雄已白頭迫切風雲千局變打空今古一身浮
少年場裏曉曾到只被笙歌掩畫樓

鳥銜

鳥銜飛葉來文羽臨風整啄葉矮闌干重啄闌干影
上元前往禾中望弔蔡石於鶴洲草堂

共說臨行日都無願語繁別離惟倦鶴鳴累有名園望

弔出常禮論心指舊旛草堂顏色在老樹奈無言

新柳

何消寫態更支離黃葉難分絕妙辭定好覓維他日艇
怕伊不要老人詩漁鄉窈窕漸濃去枯樹婆娑待賦之
還有彌天晴雪在樓臺側畔一番奇

茗帚寮諸禪作庭中石詩余亦利之

石公相見來拍肩與攜袖以此遇漁鄉入眼如故舊然
疑謔老僧白描顏百緡

茶盡用韻

此日簡遊裝水經空在袖如與故人別如隔青山舊樵
社采茶期趁他旗小縹

燒葉

星星宿火要渠傳丹翠看飄小穗煙想到洞庭秋寂莫
得來茗帚舊因緣雲林謁記尋山屐石鼎投成買句錢
落葉一編慚少作不如同擲茗鑪前

斫釣竿

貌得瀟湘痕墨汁隨意灑來朝釣春雨心向澄江寫漁
竿不用鉤漁屋何須瓦

亦杉扇頭梅幹

斷崖荒渚託根者其品伯仲松杉間以枯爲文節如鐵
我思唐人元次山

靈珏未至

溼雲去前村落落行水底槐根響篙迹水綠亦新旨引
古發籤疑叩言無一邇余亦舊隱招西指秋山紫

觀鬪草

沙面輸贏散隊遲看雲眼到小兒癡抽黃對白緣何事
冷石孤松我自期飛來柳絮團成陣移去青山影不知
牛角漢書翻幾葉戰場一樣不多時

村僧詩

挂瓢路近浙江頭埽石孤吟自唱酬斷續桑麻圍破寺
短長鐘磬落漁舟古時錢在憑谿店別縣山來仗小樓
孤負匡廬十年約架籤重把志書抽

村裏工夫看古規村僧家法帶分癡弄來獅子空登座

跨了黃牛不廢詩。圖學飛揚通本草。睡方沈著問希夷。
請從北宋前頭看法苑。何曾架屋支。

谿光山色當揮犀。景物村村是好題。得意寒林千幅雪。
知時遠浦一聲雞。西窗簾卷樵人小。春水船危塔影低。
簡點鉢囊前輩錄。定誰冷眼得全提。

種松明歲拾松釵。碧照谿堂水色佳。望裏田皆依衲線。
移來菊也號僧鞋。冷思石屋鄉情在。險話天平萬笏排。
愛把清談佐農社。水村風物未全乖。

混迹漁鄉路那分。一篇世外絕奇文。釣來破夢千江月。
伴著橫秋萬頃雲。遺累斧疏毛穎氏。絕交且逐白鷗羣。
因風說與天隨道。摩著霜顱似勝君。

是處人家湊水扉放生卻有釣魚磯經行白石清泉路
隨喜天吳紫鳳衣緩緩尋碑忘日永看看種樹又成圍
最珍二幅天然畫小李將軍寫落暉

挂網

絲絲眼裏錦成堆霧閣雲窗一樣開杏花過了池塘綠
兒住東風莫放回

香筒

折枝花已插瓶看香線還教就裏安位置不妨同研北
相投只合撚詩丸殘經意味溫存侍細雨情懷準備寒
若比郵筒差穩在羊腸何用路千盤

寄介軒

舊時人物想秦餘
雨載西山憶著渠
角里家邊千樹雪
伏生口裏未焚書
江頭釣雨客孤坐
別後垂霜髮並如
料得稍閒注經手
定來看荷種松鋤

與靈壁樵

邵氏傳家學先天
式未全自余開出
震賴汝洗坤乾漢
代春秋正茗谿易
象圓蜀中簾桶者
嗟彼後無賢

寄示旨勝舫

止與古人對了無
愁起時高鴻驚獨
悟檐雪照題詩生
白窗籠紙微黃柳
變絲樓中谿上路
得意不曾歧

老漁

野廟迎神酒色驕
蚌杯重把市西橋
閒題風月笑分手

儂是漁郎你是樵

寒食前三日

紅雪春谿雨一澌
燕來筍透未成竿
不須寒具愁名畫
漁舍煙疏一櫂寒

野廟

像古銷金碧
荒荒對挾灣
風揚旗字轉
鳥立帳門閒
鬼語松濤惡
村聲廟舞蠻
漏痕書未已
壞壁郭熙山

春夕谿堂坐雨

話長雨細入初更
感舊茫茫記不明
老至詩篇忘句味
夜闌燈火習茶聲
峰思縹緲山程坦
畫想雲林墨路輕
明曉重將吟藁削
竹窗鋪紙寫初晴

柳絲

茅卷三重雪滿天無人分給絮衣錢
暖風到處銷寒粟盡日春城散柳絲

黑摩尼

黑摩尼者評詩之刑賞格也絲以爲質墨以爲澤盛之以缶爲黠者一而雙墨環環虛中予而實者奪也限韻二十句寮中和之

夜窗響詩葉隔竹應茶杵清緒雖絲抽揚波方蘭煮松
煙染霜絮爲君作立語一規墨是懲白月標所許如前
賢對棋頃刻輸別墅灑出驪龍珠風雷生片楮落落黑
雨飛聊當詩檟楚慎弗迷南鍼同異隨朱呂貴闢風雅
邪如秋拂殘暑比古學書程之字先草鼠

簾語詩

夜間其聲而作詩

恍惚話十洲類東方曼倩黃金臺上聽騶生陳赤縣事
疑前世歷形是夢中見亂若春山雲絡繹不受串那來
文獻徵已失正索面生長無是鄉直上子虛殿其付能
畫手無此一匹絹若日月記之荒史不足羨如珠走出
盤如汞之迷鍊蟠桃三尺核奇味不妨膳鈞天帝醉時
沈如油入麴趙簡受天符中似繞枝箭後來楚漢壘史
書看欲倦誰論夢與覺事往同秋電所以遐覽人林中
坐能晏然西天東土譴發方成片嵩山摸澹影錯引宗
風線嗟哉復嗟哉夢國添彩絢夢破語皆空擲磔等珍
鈿始知簾說法書紳告禪院

題木芙蓉小幅

紅縐霜天豔骨柔
看宜水角又宜樓
生來意氣寒江上
不耐詩人做晚秋

爲洞庭蔣子方題墓松圖

蔣處士叔璩子方十世祖也墓保孤松作

圖紀事

蘇臺木葉半欲枯
雁梢雲腳青模糊
授經山市子方氏
度嶺來尋阡陌迂
衣上洞庭山翠冷
出袖短幅高松圖
軸中松影窗中客
相對風霜一樣孤
華表來歸鄉井改
昆明灰黑更桑海
鶴巢去作樓船身
墓道風吹石磊磊
還與草堂顏色在
一枝脫厄偏神彩
引來高唱秋蕭瑟
吐出文章雲蓓蕾
我亦餘年客洞庭
三徑窈窕展未經

君家故事傳暖谷道州溫然心所銘

道州有暖谷在寒亭之傍宋治平中

大夫蔣琪名之蔣穎叔作記盛寒中入此谷中其氣溫然

看君孤標古松格歲寒終

護煩山靈蓑衣補好撥煙棹松下尋看碑字青

簡兄扇上讀小宋詩

六年去絕東吳跡于里虛他小宋來

余戊午前浪跡山水小宋來吳中題

詠每著懷余句子

韻腳風流真獨唱扇頭今日怕重開記中山

上他時壁社裏人同冷谷灰還有既閑逋欠在匡廬如

約不消猜

前四年寄吳既閑短歌許作廬山補遊既閑書促

江西禪子至言陶仲調逝矣

易發知音少空山歎絕絃真思毛髮動迂有語言傳諸

老星稀日清湘落木天頻書問黃子彼早著鞭先

仲調尺牘

勤問九煙九
煙前四年沒

擔泉到

方家泉到色如冰茶帖開看惜未能月仄重生瓦鑪火
轆轤放下佛前鐙

憶黃鶴樓與些菴居士別

黃鶴磯下江水流黃鶴去存黃鶴樓我共些菴樓上別
別淚灑作江聲愁些菴白頭臨水哭樓中雲飛浪如屋
哭聲常在天地間十載西風吹墓木春江起柁還吳遲
篷窗一路動離悲堯峰塔冷補山杳重話樵堂掃葉時
病起復用來韻

竹無豔骨秋長伴雲作奇峰曉送來世事嬾從樵客問

籬花都背草堂開
單留藥嶠三條篴
誰撥咸陽一窖灰
還喜當窗枿葉凋
做巢雙鳥不曾猜

破鞋

雨痕苔點舊爛斑
移曬牆根漠漠閒
底裏何曾瞞白日
故交到處託青山
飛揚誰復追風健
零亂空將壞衲攀
更有相當兩般物
殘楓黃落石頭頑

題曹桐止先生畫鵲鵲橫幅

茂林青森饒古味
樹有連枝比同氣
無情況作有情看
癡鳥有情真足貴
世名鵲鵲曰癡鳥
癡鳥不癡人
自癡骨肉忍
被錐刀移揮毫點出
兄弟樂桐止一幅
無聲詩分甘梨
栗舊惺惺兒女情
深古道零前賢
搜得根源著不畫
鴛

鳶畫鵲鴿

還子方居士畫卷敘失洞庭秋游之約兼寄古
遺方洲

縹緲隔水引秋望孤松開卷吹清音想應知我幾人在
還與青山一樣心漫道草鞋能似虎惜他黃葉浪如金
村村打稻愁霖雨老衲關門也苦吟

夜聞水聲

打斷殘書響隔牆澗花一道繞林長夜窗太寂乍來好
老耳雖聾賴洗將想見飛揚投笠澤不放坐睡夢瀟湘
何年展意千山裏如許聲中立草堂

三月從南麻來樵堂遇病及寒而解書縛感歎

作詩

落花圖裏挂帆初，下載樵堂未展渠。
敢便絕交疏舊藥，且將解脫賀殘書。
古人喚起儻知我，往日周旋難漠如。
滋味餘清要相入，肯辭冒雨翦寒蔬。

近夜出尋楓葉遇風緊行不遠

老貪秋翠轉前岡，古墓邊穿石馬行。
歸路背將殘日炙，巔雲腳借暮煙長。
納些敗闕風吹轉，門裏家珍葉滿廊。
要補今朝遊記短，峨眉夢去整山裝。

采楓實

狡獪神仙霜葉戲，亂撒丹砂不知貴。
疏林刻劃鬧風騷，繡谷千花消意氣。
不信生芝解笑人，祇應領略蕭條味。

采來九曲已穿珠歲寒坐遣鑪煙慰

冬青子歌

女貞安名帶閨閣秋翠雄芒浪埋卻分明揮霍丈夫心
灑血寒林風索索明珠百串珊瑚紅贈君起衰籠底藥
冬青子起衰好白頭秋望心草草挽回風霜須及早

小幅

小幅斜陽竹影成投窗癡笑凍蠅聲孤煩羣本長留侍
老覺千山尙有情羽調哀鴻誰與聽書痕屋漏浪相呈
歇心未得垂垂老還取高僧傳一評

咸平有鱸鄉彙詠之刻歎美之作歌

東風吹夢入瀟湘二十年頭雲路長

余隱先師浮湘中
湘在歲丙午

遺老天際想

謂湘江些菴仲調諸老

憑仗故人存故鄉吳江煙波

青染指缺著湘山有湘水故人心眼并州刀快翦吳江
百番紙蘇臺野覲花濛濛要借天隨舊釣篷綠蓑習氣
未多讓注目湘煙在此中

王上明居士過石枰堂咸平象賢也

眼底詩名又屬將高情配得嶺雲長鱸鄉中立東西浙
藝苑分稱大小王賴有梅花一鋪供參他墨雨四窗香
時展新刻石泉試手煎同啜可合松江風味涼

雪蘭

白雪幽蘭緒各端何般琴道一時看埋藏絕谷心還吐
縞素千山香正寒積減幾分沈綠色銷成何處冷花瀾

思量南宋遺民畫天地茫茫遣墨難

山堂絕句

歷落澗聲新雨足悠揚梅片午風微
棋子拈來閒研紙
手生十九路中機

風頭料峭嶺容更吹得雲歸葉樣輕
歸雲歸後還遊否
若到匡廬我共行

芟繁於古有知音浪葉隨流不用尋
一迴擺落穠穠片
記取風前擇菜心

松還留子隨頑石菜已垂花作碎金
穿過樵村射丹翠
方知西照念人深

破椽政喜疏星漏花徑長看布鮮重
松風作合更解事

寶詩六
吹轉靈巖跌宕鐘

欄干夜拍短長吁法苑驚秋泣露珠一把江河難挽淚
方袍何處覓唐衢

寄懷茂倫

雖同江左十年隔何處白頭重見來一事讓占虎谿笑
草堂媿乏雁門才詩鐙已決南宗旨法社須追雅調回
作想煙波攜釣笠五湖載月話天台

杏花

名滿詞人集知伊應未深清華林下氣一澹歲寒心坐
雨得相領谿桃恥共尋丁寧補花史洗發貴從今

重釋响樓碑歌

禹陵寂莫禹廟扃龍蛇滿壁飛秋螢神留衡雲不磨石
七十七顆古帝青名山大川掌握裏呼吸聞闔吹雷霆
神愁鬼械避不得劣遣點畫傳其形不須九鼎鑄百怪
寒碑一片搜精靈陋儒翦鐙苦注釋蟲魚眼目難高撐
效力古怪煩不憚洗滌天地文重明

寒食前三日作

社字旗新野廟涼樵村寒食又相將敲頑逐日烹新火
怨別無心賦折楊花信幾回淹雨點禽言爲我細商量
一叢蝴蝶手自翦看放莊周踢夢鄉

春雨乍晴方洲持白民墨竹來

小立平沙洗研餘帶煙八法得遭渠移來船子垂竿手

捧著張芝竹葉書

駭小篆作歌

鈞天帝醉秦猖狂既滅七雄欺百王祖龍毒蝕李斯助
典墳一炬灰咸陽黃農虞夏忽焉沒天長地久相嗟傷
古文埽蕩出小篆巧僞結束非垂裳漢朝雖然崇小學
不過丞相斯故方修羅隻手掩紅鏡星河晝燦天茫茫
儒林好舉秦敗闕井田封建言琳琅何爲無人駭小篆
家傳師授狼虎章其體困迫不調暢削瓜臯陶面狹長
嚴家餓隸安足喻銀鐫不遺形飛揚寄言有心起衰者
放眼先秦知大綱响嚶碑存石鼓在背逆趨順休徬徨

山行

新雨琤琤澗道催石枰透葉赤成堆
茆檐未見巢泥換
鮮筍攔街賣燕來

菜花寒裏釀朱藤背籠山樵作隊登
一齊指話高坡上
昨日聽泉是此僧

渡船頭景夢中看入眼吳山一色寒
拋閒四十年前筆

狼藉雕蟲到虎官

往年在鹿山作虎官志

冰輪仄出展初回密葉瓏璫嶺路開
行行且作梅花觀
枯樹枝頭碎月來

述懷

雲山流寓歷年頻依舊相將杖與身
纖履情懷空往事
卸縣天氣又經春
著書法苑誰王粲
作伴天涯少野賓

老覓唐碑箋碧落感他哀子報親人

游裝翻喜老無家祇累圖書輾轆車白石敢期能聽法
蒼苔且喜不垂花槎牙南國身全槁瓜葛西天族尙華
喧耳春風偏意氣土牆午放蜜蠶衙

木筆花

西麟獲後書痕絕蚪斗銷沈古文滅秋毫拔擢到中山
徒隸奔馳文陣結闕文史冊不可見漢唐紛紛多雜說
老人才盡空哀歌翻喜木筆三摩挲

西施夢草歌

一日梧
宮秋警

吳王秋臺料歌舞塗抹簫韶翻舊譜采香隊歸眉月吐
雄雞叫轉扶桑輪花霧引入無愁春曲廊屢響花滿身

起來谿綠谿雲凍越絕書攤尋古夢五湖飛鴻空目送
春日一宿落木菴後華山碓兄病病起已逼夏
矣重過落木而作此詩

擲地鏘然金石吟誰拈落木舊時音生耽放浪騎牛癡
略識殷勤愛馬心蔬翦香分庭藥品茶傾綠染架藤陰
天衣要與書新額蠟匾工夫恨未深

茶未成臺借閣眠重來政及采茶前波紋蕩漾檐加冷
篆勢飄蕭樹鬪妍

池上有凡夫先生小篆

感舊論年頻倒指臨池

孤憤俯窺天五湖釣雪遊心在別字聲吞忍再宣

時將爲五

湖遊

詠芥

骨借青霜葉有稜歲寒風味合孤僧和同未肯隨仙李
斌媚從來見魏徵玉版相參高節似石泉乍洗冷煙凝
不消九錫尋花例一介題名品自應

畫法曾聞甜字禁蔬經定取介相宜山家本色盤中在
烈士肝腸味外知浩氣豫章分劍紫大名慶歷有詩垂
齒牙驗著錚錚鐵石爛松枯性未移

小雁蕩者天池之異名也雨後作小雁蕩短歌
小雁蕩補吳地記以天名池更鳥名龍湫倒飛白日雨
此亦怒瀾傳其聲蓮花十丈開池北秀冠江南山水國
天池名舊不難尋便著異名尋亦得

池上絕句

密樹不妨通語鳥短牆未欲拒青山聞道綠陰詩滿地
惜他只得暫開關

確兄來其論古易久之

傷懷竹簡付秦煙漢後箋經總未然卦譜舊翻焦氏法

詩心未得續之傳

遠公授詩義于周續之雷次宗

書來天竺飛龍在話

記靈山返櫝圓

壬子春先師有答洞庭野客問大衍易數書累幅

眞要黃金鑄

鍾子琴臺去其鼓新絃

爲振麓書琴名小築額

古存當日定琴名楓樣蕭疏冰樣清翻著轍來人會否

小窗安隱坐秋聲

貽嚴三陽逸士

先賢王電目

王光菴吳中醫隱少善鑒人江湖呼爲王電目也

古蹟詠吳中

光菴

集有吳中

定拾遺民記重開澗上風尋碑煙路引采藥

古蹟詩綠阡通矮屋蘇臺下思君清話同

和曹桐江題畫之句而爲漁社漫歌

畫之逸品曹桐江勳名翰墨一等視雲浮愛他江魚方
育子獨坐不垂鉤宕漾看山一白頭我本苕谿人與說
苕谿話西奈北宋端師子披師子皮婆娑舞了蹋仄瀟
湘舊釣舟管他漾之夾山湖之碧浪透得漁歌唱便休
憑誰喚起桐江太史問百年前漁樵風味將眼前賸水
殘山試較籌一聲欸乃收綸去正是洞庭秋

樵乘

寓紫石作

南朝傅粉借風流誰把樵裝逸事收
穿林山髻都黃髮只爲松花撲滿頭

樵歌唱轉墓門邊清散松鍼刺紙錢
笑騎石馬圍樵伴妄意嘶風試著鞭

蓋世勲名土一堆樵餘感慨撥莓苔
思量八角茶名好還把功勞件數來

濃青亂點水煙重一綫盤雲正挂龍
樵路明朝新雨過四山老樹沐秋容

夕香門改東籬二首

偶然門改仄恰受外層山華表不足
避危青俾守關鄰菴遙出牖樵籠晚
迎還一綠我深許茅堂雜樹環

六 寶譜六
綠癖得隨順藤扉開麥秋五湖緣未定一角樹新收種
藥方書證看雲畫譜求樵朋亦延話不是例關休

五日曉霽作詩方洲夜來宿山堂早辭去

天容曬藥收絲雨客爲看雲渡曉湖浪跡十年思縹緲
遭逢今日有菖蒲桑珍返老拈重綠草取刊華采夏枯
佛前拳石聊修供顧字家傳一字符

苔語至

隔個嶺頭緘帖少也知洗鉢外頻煩破除寒暑聊搜句
閱歷榮枯賴灌園餘潤齒牙梅子嚼生涼談席竹風繁
乍來語路無阡陌忘了山堂五月喧

述王允憲處士清事

底須梅鶴染詩腸聞道長焚獨坐香
婚嫁免愁羈五嶽無家偏喜壓襄陽
好山歸路煙盈衲新句收來雪一囊
濠上懸知魚樂在雲棲社集要提綱

題李長蘅小幅

此景尋思何處見湘山飛不起秋煙
若將蒼莽齊詩品三百年來沈石田

雨後靈巖狀兄餉椒餅

乍卷雲衣晴色嫩半黃梅子綠陰饒
定憐同味分餘餅儻悉孤懷更糝椒
含辛天地禪風薄洗鉢湘潭舊夢遙
拾紙寫來麤句報牆頭牘合過鄰樵

六月曬書古堯峰同喻兄夜話

鞠躬盡瘁當年話

述舊在大鑒堂侍先師兩坐自誓之語

白髮吞聲祗淚

垂湘館追風今獨羨茶寮吹火我猶支壓肩擔子殘書

累撲袖湖光冷翠宜提到衡山飛動意冬青閃鑠剪鐙

時

雨後山堂夜集有感

眼向青山未肯垂竹根鑪畔集新知相當細雨閒評帖

小損春風爲勘詩

時爲山中諸禪第韻語耳

草菩提斷穿尋綫井輓

轆聲淚欲縻

坐中偶語及過去門人兼樹

縹緲石屏眉疊夢挑鐙說

著舊癡兒

秋前破例作華山遊從喻兄借書來

水牌新樣出書坡排日吟涼樹下多又向湘雲借書來

蓮花底有看書窩

題畫扇

遠峰一抹雲太古崖勢仄吟聲出書屋秋心傳所得

題畫

疏林深淺相當半嶺陰晴乍變湘西煙翠飛來染著漁
帆一片

畫品亦如棋品局局風流各變看他奪角衝關演得秋
光成片

寶雲詩集卷六

寶雲詩集卷七

拂煙集

漏霜南潛著

曬書用韻

乙丑秋

拂將煙篆與蟲絲
書腦排齊一展眉
攤在滿身苔蘚石
倒疑無字舊殘碑

青簡堆堆髮似絲
桐風苦句憶通眉
愛書愛馬雙清癖
山尾山頭兩豎碑

松鍼

冷簇小規青芒垂
數枝勁指南一路
非吹亂方無正拈
與付詞人繡出秋煙竟

有頭而無尾穿罅無一髮投之滿盂水
鍼浮終不沒誰

呼龍樹起看刺青天骨

草菩提

居高不能卑尊貴翻成過委之在荒榛菩提非自墮所以持勝輪貴擊虛空破

從來千佛名渺若秋雁過草座亦不居白玉臺眞墮譬如黃鶴樓崔顥曾題破

入草亦不辭此是諸佛過一葉儻遮睛名身隨以墮撥動光明珠一粒一塵破

我有先天句刹那刹那過過則現量超佛頂青不墮拈他小彈丸立把宗綱破

松路

平看白鳥雙去倒相長松頂頭蹋著簇新句子澗邊步
步清秋

遊帶詩中活眼山看畫裏磬頭載得松風澗月五湖去
賣新秋

聞蟬用韻

高樹吟風合墮樵千摧萬抑響山寮巧將斷續傳心事
恰似龍眠與白描

詠啞蟬用韻

臨高無復喚蘋風枉了谿青夕照紅坐待秋窗絕餘響
不關雙耳老來聾

悲秋口角付西風薄翅搖空等葉紅留得吟窗孤響在

不教徐積只推聾

題畫 二首

搖枝挂松颺窺人目還仄小停圓月上樹影虛窗得
層層縛屋牢步步緣花仄松閒亭子寒無使雲先得

初秋和華山和尚韻

元來天也要知音辦取批山抹水心待看秋風擅場手
山塗翡翠葉塗金

石牀閒殺綠錢疏待我思量點綴渠埽葉帶兒安一角
靠松根閣幾堆書

爲友三釋字

損益論交道曾聞闕里書師伸三指苦汝把百非疏潔

徑秋編帚穿松雨荷鋤關心一趨步事事慎其初

補衣

照人瘦影月斜出伴著孤鍼竹一叢相當衲綫頭絲白
乍報風霜嶺樹紅

指甲鈍來移舊綫補丁湊著像知音有時渴睡迷離眼
錯把虛空割一鍼

別後雲峰意尙閑舊衣片段一堆頑依稀綫路瀟湘雨
提起衝寒夢裏山

配得山門色似灰衲頭百孔鮮花堆穿鍼只備支風雪
肯換眉山玉帶來

華山兄題扇面谿亭依韻

亭子像浮葉苔花滿衣綴安得移遠山吟看飛鳥背

秋日卽事同華山兄

漸看紅繡落楓春瘦削千山未覺貧背冷喜憑松作蓋
眼花笑見月重輪何須點首分橫豎慣把吞聲當指陳
他日谿亭名二老瀑花飛濺髮如銀

三十番花換綠春研山往日共貧腸中難免奔車轉
指上愁將歲月輪詩路打開端要別遺言苦述不妨陳
宵深揩眼重相問誰賣銀城的是銀

參花枯木歲寒春錦繡成堆說其貧巧合古來珍合璧
無雙天上有雙輪盤雲白鶴周旋久

乙丑七月望後四
鶴來蓮花峰頂

排闥青山次第陳笑憶回仙遺話好誤人怕鍛汞鑪銀

作止和詩次韻呈華山兄

拋琴從此罷陽春詩亦如人貴守貧截住合流迴澗道
生他四角礙車輪秋山閣筆無窮好小弟忠言不再陳
打掃詩林停韻腳重門新鑰要裝銀

掃地

卷廊秋葉韻鏘鳴把帚吟來與和成老漸虛懷習恭謹
空山且學折腰行

一回劃破舊苔紋墜葉堆來又幾分畢竟秋風勝人力
看他天上掃浮雲

橫披豎抹夕陽中帚染苔青并葉紅不是秋山逃錦繡
單提潔淨舊家風

立斜樹影月盈庭折得搖空鳳尾青祇爲紅塵飛不盡
銀河邊有簸箕星

中秋雨

莫倚梧桐更問天秋光打斷雨絲連應知月在浮雲上
也恨人無覩面緣

燭短吟長澹墨天情如蜂蜜釀黃連明年西塞山邊月
翻轉斜風細雨緣

書見桃禪衲扇面

蒸出紅霞海市樓落英飛到釣船頭好拈一幅惠崇雨
換眼青蘆白雁洲

題拈花圖卷

賢劫第四釋迦佛撒沙婁至那邊行誰將一笑春風面
聽做頭陀痛哭聲

打新栗

喚拾青青栗棘蓬楊歧打眼也冬烘兩手雖然無著處
會看到口玉玲瓏

渾身翠蘚裏泥團未剖泥團卻被瞞一味綠攢傷手刺
泥團休弄只堪觀

詠扇篋

祇道清風無住處元來摺向此中藏明年花信番番過
把出重新爲舉揚

青香櫟

未降霜時得未多黃柑那許與同科配著滿林香翡翠
濃青箬笠綠漁蓑
風霜心事舊囊藏竹柏青蒼共寺廊僧老面紋同百皺
比量輸我幾分黃

詠苔錢

蹴蹋青錢自在行卻疑腳下有雲生買山無計空囊老
方信虛名誤一生

詠炭

畫炭囊看沈石田橫斜寸寸抹松煙不曾寫到紅鑪鍛
打徹光明黑暗天

補窗

斜斜整整紙痕聯照樣僧衣挂水田後夜長空新雁過
免將殘影落鐙前

劃斷寒光片紙中裏頭光借外頭紅傳語茫茫門外漢
從今休怪不通風

煎茶聲

竹鑪吹火入初更調合松風分外清昨日瀑花飛百尺
熱時聲比冷時輕

鳳仙花

谿雲吹出舊秦樓天上簫聲付碧流小鳳蹋花紅淚溼
漢唐池館幾迴秋

華山鳥道

穿雲鳥道透重關
跳脫鸞飛鳳舞閒
之繞轉頭看倒筆
知音畢竟趙寒山

石布袋

擘不能開袋口寒街頭故事又更端
大地山河裝未入
勸君莫向裏頭看

同禪者從澗橋下至華山初地感古有作

話斷還相視秋泉照影時
花看龍爪攪路想馬蹏遲往
事山經在新名石貌疑歸
閑右軍帖人外定誰期

秋田

秋田蹋蹋喜初晴
黃染殘陽綠漸更
君看青山影中稻
垂頭都學老人行

燕菴歌

黃茅未是藏名地且停茶杯論燕字燕安燕樂詎心期
溫飽男兒非所志繇來所悅以爲安乘危不用逡巡避
不見嵩山積雪中接續西天人斷臂吾論燕字更深層
要法宗綱提古義室內閒閒樂未央兒孫得力須牢記
子順於父臣輔君寶鏡分明勞逸事春風不上玉簾鉤
落花遊絲遠天翠只教燕寢靜凝香功成灑落翻秋翅
燕安歌歌未備古來漁父忘棲巢隔水問巢應有意打
埽精藍法界寬二袈裟地何容易

夜坐用簪侍者韻

也想黃牛買一頭谿山好處跨來休而今且把書遮眼

金言一
鑿鑿孤鐙一檻秋

八月尾宿堯峰頂聞喻兄說嶺半虎事

半山瞋睡醒鑿鑿坐來遲打瓦葉飛急鐙前說虎時

寄紀大韶

學的紅心幾個穿天荒地老疊殘編知音尤喜生同世
定論真須到晚年永叔浮雲石門破黃牛枯墨少游傳
不消評史勞勞問看畫名山話始圓

靈璧樵易說未成詩以促之

鐵障千年易學盲華山一半互陰晴圖成吾已垂垂老
算合何堪緩緩程斷爛緯文傷兩漢革除亥正爲秦嬴
杏檀吹得沈灰起不負寒樓舊短檠

寄靈珏未

長空雁影去來身喜汝能將祖意陳
免水舊曾分半偈
曉寒早已籍門人羣空西極來天馬
法到神州感獲麟
只嚼枯柴病僧話宗風家學轉雙輪

九日雨色中子深喜曾過訪子深留新詩一幅
去

破堂九日彈詩苦宿雨高梧緩滴殘
蹋葉又隨秋浪遠
翦鐙來共夜窗寒青山難喚石湖起
是日始點石湖詩本俗禮幸
逢乖叟寬博古品評誰正眼袖中珍重玉螭蟠

櫟菴歌

吾昔衡山遇樹王樹無名字身昂藏
樹王無名以爲用

無名之名名乃揚又嘗親見松篁石鱗甲鍼莖成石脈
名松名石等空名用著空名見標格此二樹者真絕奇
無甚高論從其卑曲輟蔽牛櫟社樹臨山千仞才橫枝
匠石不顧櫟不怨櫟黎橘柚徒堪悲古來大用在無用
繩墨不中天年持藏於龍雲用獅吼天山聖謨亦有之
珍重藏身舊家法翡翠秋枝雲外插

木犀香裏同以翼倚拙祖明諸公軒中語

一院秋香集素心單提冷字是知音玲瓏尤喜藏身綠
瑣碎從看滿地金撥著秦灰思古鼎收來宋歷當遺簪
華山兄述見南
宋舊刻歷本
無端浪跡無端話留句詩教後日尋

詠木魚

肯貪香餌逐青蘋出水紅鱗定有神搖撼千山一聲吼
始知枯木口含春

雁字

望江南曲唱初殘和雨和煙寫段酸配得巴江新疊筆
倚來卮字舊欄干祇貪草草斜行去不管茫茫老眼看
傳語天衣問秋影寒潭摹得幾分寒

短亭橫浦浪秋辭淡墨斜飛幅幅奇讀未成文添遠想
風來吹側更多姿疑今疑古何年體江北江南幾箇知
注目衝雲天上去玉樓聞道要新碑

莫是飛來答惠崇斜題一幅雨煙中蘆花隊裏茅菴額
秋水澄來墨法空萬卷浮雲橫嶺上六朝如夢寫江東

若教撞著功臣政免得塗雅學小童

鳥道霜寒鶴夢醒
隔層煙樹篆痕青
誰疑平仄篇頭韻
只聽丁璫殿角鈴
端的無言垂古調
分明天上布新銘
從來解讀推漁父
只在秋蘆水一汀

華山之頂有石名曰雲父

戀子非無意爲霖
那緩飛何曾全不顧
祇是未教歸霜
喜遮紅葉風看動
白衣閒閒得安坐
身遣綠苔圍

詠靈巖饅頭石

清齋壓倒露葵烹
牢九誚訛攷未成
千縷白雲權作甌
一抔黃土愧同名
安知腹內能容否
不耐形模太冷生
礪齒可能真漱石
這回咀嚼試行行

中秋雨

莫倚梧桐更問天，秋光打斷雨絲連。
應知月在浮雲上，也恨人無覲面緣。

前題復和華山兄

燭短吟長澹墨天，情如蜂蜜釀黃連。
明年西塞山邊月，翻轉斜風細雨緣。

和敘兄和尚韻

秋山繡簇未成貧，充作伽藍白髮民。
短技自量齊磈線，舊交相似合絲緡。
坐提研石看雲話，同侍衡峰執帚人。
洞壑從今決游約，樵車肯碾世閒塵。
敘兄二十七年同余在靈巖侍紫雲山自此不教分老去相當遠岫曠一段配兄詩絕妙

千峰圍得翠紛紜名傳蜀郡思鄉夢畫闕倪迂澹墨雲
況說騎牛田舍樂功臣風味願同羣

書見桃禪衲扇面

蒸出紅霞海市樓落英飛到釣船頭好拈一幅惠崇雨
換眼青蘆白雁洲

枯木

飛來蝴蝶作秋蕊斑剝滿身蟲篆鋪誰見風霜搜骨苦
打成文彩費工夫

伏虎碑

伏虎唐代碑舊埋崖腹裏裂山自何年露石文宛爾骨
藏渺斷雲高僧跡奇詭合有騎虎圖傳觀毛髮起不知

好事誰重與搜畫髓洗腸留寒泉借以潔人耳吾來秋
正深碑前葉如綺

補進山詩

十月望日

茗谿習漁樂初掉荆谿裏茗谿與荆谿相當一秋水月
三日抵荆谿

心同谿路迴懷積未能散把手論心深不知交日淺水
遇懷夢老居士

昔賢愛馬處頃自彼中來支許篷窗話相期古路開日

離華山明日宿段莊四日至郭外也

行行及水窮問名云大澗摩挲數縛書樵車應未慣

大澗

樵車雨中上車路曲能尋去冬才六日楓隱正楓深遇
急雨樵車過楓隱

留得古雷痕稠錫經殘樹寺門隔澗橋一橋黃葉雨至
寺
夜述西洞庭舊事

破鍋炙手冬茶炒土簋撥眉苦橡丸不信鐙前青縹緲
夢中疊翠換銅棺

漢壘

依稀戰壘傳炎漢轉換衡雲記赤烏晨鐘杵醒鴻溝夢
寫幅寒崖脫葉圖
相傳漢王戰壘而名漢也

南嶽村

樹光晴亦溼綴屋劣成村石頭排雁次樵事坐來論

山雨感懷

秋裝卸定雨絲絲合眼吳山尚未離垂老遊程真秉燭
就閒句譜類殘棊出師衣要輪番讀船子歌留浩蕩思
絮語臨窗二三子青山宜我更無宜

夜霖雨垣傾一絕

古來琴操寫崩山霖雨垣頽意政關打合老僧癡界內
石頭大小一堆頑

病目

雲浮四壁訝新晴觸樹寒花歷亂生句法能留詩裏眼
江山儻助老來情古人未忍隔相見殘卷得開須暫明
悶簡方書餐菊外也思尋藥澗邊行

南嶽樓中有感

說著浮湘淚幾揮三閒樓窄竹笆圍
剗來退道坡全坦減樣匡廬布亦飛

書籤木葉共秋聲山帶西谿淺綠橫
準備釣蓑衝雪去白頭柔櫓耐煩行

茗谿接壤總漁鄉里語年來半已忘
風土記中詳寫未粉蛇紅燭祭蠻王

卜居陽羨事飄零山水空傳筆墨靈
不信千秋蘇玉局天邊泥著破鞋星

古松鬣動澗花飄轉憶梅谿立板橋
幾個江南一江北雨中同話仰山欽

從來泉石煙霞疾問著醫門袖手多急須料理看山眼
痼癖膏肓一任他

寺閣吟

補處身何敢衡峰號媿同湘帆隨向背吳地乍西東舊

衲千山雨新巢一字楓老師題榜與還在侍寮中

余給侍靈

巖時先師爲題楓巢二字

寺故鄰楓隱山山楓色齊小樓隨意坐孤笑不勞梯對
石眼同冷評雲首未低會心前輩墨選勝說荆谿

往余畫埽地圖至南嶽半月而不能舉帚也自

嘲作詩

離言幾度從忘帚識字無人解寫箕那知埽地圖中影

浪作談天座上詞

朝煙

朝煙赴亂雲去雲無一尺欲辨煙雲者煙青雲是白

振麓和山閣吟余復用韻

二首

遙情縱孤領遊亦要人同點筆由雲背斷崖朱閣東譚
醫拈鹿草射雨轉神楓碎事備蔬筍拾來秋翠中
百尺樓非峻高言不易齊退之詩裏說太華采無梯語
鳥緣中暗崖松影乍低斜陽善提示一樓射前谿

澗邊

得徑就樵席竹中宜小軒低留雲宛坐嗚咽澗如言本
務課編帶閒心嗜灌園老藤鬚鬣古往往學垂綬

感事

晨星幾點食堂偏遠把家風冷澹傳蕭條南嶽三聲板
省卻汾州一陌錢

敘兄貽香簃

一器香簃傳手帖寫言要配竹根鑪依稀相識雷文角
樣在宣和博古圖

山居

退院僧來赴寺招量才只合逐行樵藥備夜煎收木屑
飢煩近侍饋鍋焦尙留釣具重栽竹廢撫詩丸只挂瓢
多恐葢頭雲片笑出坡又把破書挑

面面峰名憶洞庭此中來倚四窗青打眠學樣松根碣

寶詩七
無舌真看殿角鈴雲絮難裝鐙下衲月輪伴了畫中經
詩牌影壁紛多件暇日思量遍作銘

老來膽小靠前聞碎事猶堪寫贈君茶重水評元取澹
藥尋火候也須文瓢樹還同茗帚挂硯池新向洗腸分
松風澗月從來富更賸牀頭一甕雲

廚慣無鹽圃少蔬荒涼像住石屏初堂空待補單條字
葉脫容看來夾注書采來橡足鍋催洗抬得詩迴草督除
清事更番政無暇寒山課和不曾疏

紅樹梢頭早雪時看花霧裏老休悲

秋後
病目

平提世事慵

開眼單爲青山又覓醫舊路湘江留段夢故鄉石屋有
編詩渡頭喚起當年句雲帶鐘聲出嶺遲

心難喚起古人論樹有搖霜幾葉存解事雨聲供展卷
可人木樨稱支門水尋天目高源路雲看銅官出處根
裝點漁樵社中景山童掘藥鬧孤村

舊圖憶遣高人墨忽到山窗潑眼明孤閣擁青文待詔

段雲橫白李長蘅

昔年藏此二圖
遣去經三十年

較晴較雨分農話街

草銜花驗鹿行最是療飢希有事齋堂板喜一聲鳴

北宋猶傳古調琴石門妙總立言深青山只葬高人骨
白日難埋大雅心落葉誰將豐草續梨花還記角頭尋
竟陵書督匡廬約遊債茫茫負至今

西塞桃花繞路霞生緣我本是漁家伸眉萬卷挑鎗蕊
留髮三冬鬪雪花省轉湘帆來嶽寺擬尋芥路止樵車

地頭茶器收藏易陸羽傳經定未差

憔悴門風聽自嘲拚將枯樹與人描雞毛筆買愁空橐
鴉嘴鋤攜晚定交聽瀑有時拖客屐絕糧無計解僧包
獻徵零落禪林事悶把鐙前禿管敲

破布衫

破衫故事苦絕少近事零星聊足誇碎荷葉畫曹太史
補綠萼詩陳白沙曹桐工太史有碎荷葉一幅數年前
余爲作歌陳白沙詩老妻連夜補萼
衣天上浮雲飄蕩似青州斤兩重輕差關心畫壁朝陽
衲點燭來看山月斜

夜燒山藥

洗閤銀砂映月灘鑪頭分得冷花湍入地肝腸還似雪

夜深拈在箸頭看

蔬盤

曉堂隨眾粥例有小蔬盤乾蔬備筋骨入口咀嚼難老
人苦齒脫白粥自勉餐禪子或念我列坐默而歎椒鹽
分別器聊供老者安空山食同堂一味共甘酸無齒斷
朝蔬敢煩眾慮禪入道共休戚土簋誓同懽念老意勤
厚我媿坐自瞞食堂收異器莫遣古風寒

松影

屋瓦綠鱗鱗側臥高松影松聲屋上鳴呼他影不省

洗腸池看瀑

挽得銀河一道寒匡廬布水夢初殘思量尙欠東林集

可惜曾無李白看
驗古人腸
濤似雪隔風塵
路谷如盤
飛湍鳥道稠青樹
留在風霜過後觀

瑞香花

壓枝瑣瑣白含香
梅蕊前頭蘭未長
何事名高比麟鳳
爲他歲暮矯風霜

豆苗

山堂一夜生冰絲
蛟館織綃綃
所遺或疑減樣細
玉箸陽冰吞聲但道奇
湖中萁條沒青骨
谷口水簾垂凍縈
實頭指出全不爾
移換淵明種豆詩
山家蔬譜豆苗雋
盛以玉壺貽所思

題閣後壁觀

南嶽高閣當崖半閣開東軒青影亂後來思好軒子名
行隸題之爲壁觀當年壁觀婆羅門屈殺達摩罪妄判
二字非佳名大佳此中立言奇一段鐵壁鐵壁自己看
已是鐵壁全不換譬如玉手點青蠅曉用薔薇香露盥
作是觀者名正觀壁非是壁觀非觀

白蛇洞

白蛇知愛茶風韻蛇有凌雲仙骨分曾聞鶴作仙人驥
蛇亦僧坊效搬運陽羨茶名在天地茶子銜時誰解問
幽宮應在卓錫泉冷含山雨飛秋煙

指南堂

小築崖當面開窗綠一方指南南孰是留與側身商

登傳病後作詩慰之

冷未敗人意谿山病後清
放懷雙眼碧餘力五言城小
技文猶障孤峰頂要明夜鑪
同撥芋期把舊鐙評

素臯脫虎口一絕記事

虎口翻身意氣麤爪聲拂袖
葉聲枯籬笆缺陷低牆接
此地曾經捋虎鬚

除夕示振麓登傳

銅棺匿其峰老翠層如翦雪
寺逢遲暮詩丸不能撚先
師憶瀟湘旅亭猶自匾況我
習吳山扁舟思不淺

寶雲詩集卷七

禪樂府目錄

臺山編

臺山路	洞山麻	吹紙燭	永字法	轆轤
鑽	黃鶴樓	牡丹夢	禾山鼓	雪峰球
高安灘	芭蕉杖	魯祖壁	迦葉舞	青州
衫	吹布毛	華亭船	東海鯉	處士畫
呼小玉	破竈墮	五通仙	捧鑪神	飯袋
子	洗鉢孟	汝水流	寫戲來	南山茆
輓繡球	靈樹碑	虛空鼓	水盆劍	露柱
餅	書梵字	望州亭	隔江招	弄師子
鰲山雪	銀彈子	子湖牌	小脫空	赤梢

鯉 無底籃 風旛動 塗毒鼓 白馬廟

鷓鴣香 嶺中去

禪樂府

臺山編

吳興董 說若雨著

敘曰一聲漁父瀟湘江上動吟魂別樣風流錦繡
幃中酬豔曲宮沈羽振玉轉珠迴然法苑笙簧疊
奏聯珠之頌詩林鼓吹未聆天樂之音義取鐙元
辭分鍾律禪樂府之名請從此始佛法曲之外差
有微長

臺山路

僧遊五臺問一婆子曰臺山路向甚處去婆
曰臺直去僧便去婆曰好個師僧又恁麼去
後有僧舉似趙州州曰待我去勘過明日州
便去問臺山路向甚處去婆曰臺直去州便
去婆曰好個師僧又恁麼去州歸院
謂僧曰臺山婆子爲汝勘破了也

歷落長江流不住芒屨一編無遮護樂府休翻蜀道難
千秋眼底臺山路金烏無情玉兔速短亭不管楊朱哭

洞山麻

僧問洞山守初宗慧禪師
如何是佛師曰麻三斤

麻三觔吹作瀟湘一段雲僧繇笑展丹青手難繪長天
鳥跡文寄語春風翰墨場莫將觔兩錯商量睦州有箇
轆轤鑽一併投他骨董箱

吹紙燭

德山禪師初往龍潭至法堂曰久嚮龍潭及
乎到來潭又不見龍又不現潭引身曰子親
到龍潭師無語遂棲止焉一夕侍立次潭曰
更深何不下去師珍重便出卻回曰外面黑
潭點紙燭度與師師擬接
潭復吹滅師於此大悟

古鏡重磨墨如漆蚩尤旗埽精靈窟黃鶴樓碎鸚鵡翻
大地山河眼中失龍潭神俊老無匹天馬嘶空善奔逸
六螭紅輪夜中出

永字法

睦州龍興陳尊宿因秀才相看云會二十四
家書師以拄杖空中點一點云會麼秀才問
措師云又道會二十四
家書永字八法也不識

須彌染雲如染墨倒卓虛空遁筆力四海飛濤秋研滴
塗抹星辰天地黑鬼哭無聲倉頡匿鐵畫銀鉤空記勒
蘭亭眞帖憑誰得

輓轆轤

睦州陳尊宿因雲門敲門乃問誰門云某甲
師開門便捻住云道道門擬議師便推出云

秦時轆轤鑽

轆轤鑽天無岸鑽轆轤芙蓉鏐雲門一字運斗樞威靈未改秦時符是辟不祥名瑞圖海枯露出紅珊瑚磨兜堅錯入儒林作話傳如呼豨樂府轉音人不知陳蒲鞵情性乖翦拂青松當古釵門前好挂賣癡牌

黃鶴樓

長沙因秀才看千佛名經問師曰百千諸佛但見其名未審居何國土還化物也無師云黃鶴樓崔顥題後秀才還曾題未曰未曾曾師云得閑題取一篇好

鸚鵡洲空黃鶴去百千諸佛棲何處南浦離魂微雨中樊山幽絕江天曙黃鶴樓黃鶴樓衙官屈宋丈夫事那管崔顥題詩在上頭

牡丹夢

南泉普願禪師因陸巨大夫云肇法師也甚奇怪解道天地同根萬物一體師指庭前牡丹云大夫時人見此

一株華如夢相似

南園蝴蝶飛如雪長柳書中收不得片時踢盡江南山
誰將枕子輕推出華清遺事無消息魏國姚家難復覓
空向元輿賦裏看占斷春風名第一護花闌冷鈴聲絕
無人重鼓南泉瑟

禾山鼓

吉州禾山無殷禪師僧問習學謂之間絕學謂之鄰過此二者謂之真過如何是真過師曰禾山解打鼓曰如何是真諦師曰禾山解打鼓問即心即佛則不問如何是非心非佛師曰禾山解打鼓曰如何是向上事師曰禾山解打鼓

白鳥飛邊斷秋雨漁家一簇煙如縷歷落乾坤無寸土
禾山鼓綠楊古岸青猿舞

雪峰球

福州雪峰義存禪師因立沙問某甲如今大
用去和尚作麼生師遂將三箇木球一時拋
出沙遂作斫碑勢師云你親在靈山方得如
此沙云也只是自家事師一日升座眾集定
乃輓出木球立沙遂
去捉來安於舊處

七輦妙舞飄輕裾遊龍驚鶴變態舒燭花圓炤雜戲作
舍利翻騰比目魚百尋巨獸號曼衍神山變律通仙車
咽刀吐火畫河洛跳丸躍劍身凌虛四筵歷落掉神魄
北斗可攀山可漁象骨峰頭老狡獪逢場拍手春風餘
木球輓出無聲曲祇有玄沙愛水嬉

高安灘

鎮州臨濟義玄禪師初在黃檗會中行業純
一時睦州爲第一座乃問上座在此多少時
師曰三年州曰曾參問否師曰不曾參問不
知問個甚麼州曰何不去問堂頭和尚如何是
佛法的的大意師便去問聲未絕檗便打師
下來州曰問話作麼生師曰某甲問聲未絕
和尚便打如是三度問三度被自恨障緣不領
承激勸問法累蒙和尚賜棒自恨障緣不領
深旨今且辭去州曰汝若去須辭和尚了去
師禮拜退州先到黃檗處曰問話上座雖是
後生卻甚奇特若來辭方便接伊已後爲一
株大樹覆蔭天下人去在師來日辭黃檗
曰不須他處祇往高安辭頭參大愚必爲汝
說師到大愚愚曰甚處來師曰黃檗來愚曰
黃檗有何言句師曰某甲三度問佛法的的
大意三度被打不知某甲有過無過愚曰黃
檗與麼老婆心切爲汝得徹困更來這裏問
有過無過師於言下大悟乃曰元來黃檗佛
法無多子愚擲住曰這尿牀鬼子適來道有

過無過如今卻道黃繫佛法無多子你見個
甚麼道理速道速道師於大愚助下築三拳
愚拓開曰汝師
黃繫非干我事

高安灘頭石鑿鑿高安灘上波聲惡有鞦不踢高安灘
莫信青天蜀道難

芭蕉杖

郢州芭蕉山慧清禪師上堂拈拄杖示眾曰
你有拄杖子我與你拄杖子你無拄杖子我
奪卻你拄杖子
靠拄杖下座

有拄杖渡海鐵船輕蕩漾無拄杖螺螄吞卻南州象撥
起芭蕉兩道眉雙峰倒插青天上

魯祖壁

池州魯祖山寶雲禪師尋常見僧來便面壁
南泉問乃云我尋常向僧道佛未出世時會

取尙不得一個半
個他酒麼驢年去

碧雞黃馬成塗轍炙轂談天謬分別塞斷清辭玉露銷
嵯峨壁立銀山截走九俊辯談無舌日月雙輪熾然說
滔滔萬里河流折盡滴祖師悲願血人間不信冰花熱
眼中添得黃金屑

迦葉舞

世尊因乾闥婆王獻樂其時山河大地盡作
琴聲迦葉起舞王問迦葉豈不是阿羅漢
諸漏已盡何更有餘習佛云實無餘習莫謗
法也王又撫琴三徧迦葉亦三度作舞王云
迦葉作舞豈不是佛云實不曾作舞王云世
尊何得妄語佛云不是妄語汝撫琴山河大
地木石盡作琴聲豈不是王云是佛云迦
葉亦復如是所以實不曾作舞王乃信受

禾山打鼓雪峰球秉笏擎義蕩釣舟大戲場中顛不了

打從迦葉弄虛頭

青州衫

僧問趙州從諗禪師萬法歸一一歸何所師曰老僧在青州作得一領布衫重七斤

青州衫重七斤呼牛呼馬非煙非雲左手握霧與影平分

吹布毛

鳥窠道林禪師見秦望山長松盤屈如蓋遂棲止其上故謂之鳥窠禪師復有鵲巢於側自然馴狎亦目爲鵲巢和尚有侍者會通一日欲辭去師問曰汝今何往對曰會通爲法出家和尚不垂慈誨今往諸方學佛法去師曰若是佛法吾此間亦有少許曰如何是和尙佛法師於身上拈起布毛吹之通遂領悟玄旨

一莖草上瓊樓現萬戶千門飛紫電竿瑟箜篌法樂身

餅盤釵釧黃金面鳥窠破的忘歸箭白羽飛甍安足羨
霹靂弦開天地變梵語唐言穿一線

華亭船

道吾到京口遇夾山上堂僧問如何是法身
山曰法身無相曰如何是法眼山曰法眼無
瑕道吾不覺失笑山便下座請問道吾某甲
適來祇對這僧話必有不是致令上座失笑
望上座不吝慈悲吾曰和尚一等是出世未
有師在山曰某甲甚處不是望為說破吾曰
某甲終不說請和尚卻往華亭船下無卓錫
曰此人如何吾曰此人在山上無片瓦下無
和尚若去須易服而往山乃散眾束裝直造
華亭船子纔見便問大德住甚處寺山曰寺
卽不住住即不似師曰甚處學得來山曰非
不是目前法師曰一句合頭語萬劫繫驢橛
之所到師曰一句合頭語萬劫繫驢橛又
問垂絲千尺意在深潭離鉤三寸子何不道
山擬開口被師一撓打落水中山纔上船師
又曰道道山擬開口師又打山豁然大悟乃

點頭三下師曰竿頭絲線從君弄不犯清波
意自殊山遂問拋綸擲釣師意如何師曰絲
悉緣水浮不定有無之意山曰語帶玄而無路
舌頭談而不談師曰釣盡江波金鱗始遇山
乃掩耳師曰如是如是遂囑曰汝向去直須
藏身處沒蹤跡沒蹤跡處莫藏身吾三十年
在藥山祇明斯事汝今已得他後莫住城隍
聚落但向深山裏饅頭邊覓取一個半個接
續無令斷絕山乃辭行頻頻回顧師遂喚闍
黎山乃回首師登起橈子曰汝將謂別有乃
覆船入水而逝

三柳煙銷峰影碧舴艋爲家任狼籍荻花楓葉秋滿天
絲綸帶月垂千尺覆船老遂風波癖千秋靈骨無蹤跡
釣灘曉射晴霞赤

東海鯉

越州乾峰和尚因僧問十方薄伽梵一路涅槃門未審路頭在甚麼處師以拄杖畫云在

這裏僧後請益雲門門拈起扇子云扇子踴
跳上三十三天築著帝釋鼻孔東海鯉魚打
一棒兩似
盆傾會麼

火中之髮必有峰頂之船扇子踴跳上三十三天東海
鯉魚打一棒兩似盆傾殊不然仙人赤松奉藥一丸飲
以陸海之水令無舌人端唱真言陛下和樂億萬年

處士畫

大陽明和尚問梁山如何是無相道場山指
觀音云此是吳處士畫陽擬進語山急索云
這個有相底如何是無
相底陽於言下有省

萬里遙山墨數尺劍花歷落天官壁揮毫氣挾裴將軍
慘淡風霜鬼神立畫山分主客畫樹兼正側畫龍怒爪
石畫馬夜踴齧轉換山魂移水魄無手精靈弄丹碧鐵

馬嘶秋曉無跡

呼小王

昭覺寺克勤佛果禪師在五祖侍者寮會部
使者解印還蜀諸祖問道祖曰提刑少元無
讀小豔詩否有兩句頗相近類呼小王元無
事祇要檀郎認得聲提刑應喏喏祖曰且任
細師適歸侍立次問曰聞和尚舉小豔詩提
刑會否祖曰他祇認得聲提刑曰甚麼卻不
得聲他既認得聲爲甚麼卻不是祖曰如
是祖師西來意庭前柏樹子復自謂曰此豈
不見雞飛上闌干鼓刻而鳴復自謂曰此豈
不是聲遂袖香入室通所呈偈曰金鴨香
銷錦繡幃笙歌叢裏醉扶歸少年一段風流
事祇許佳人獨自知祖曰佛祖大事非小根
劣器所能造詣吾助汝喜祖徧謂山中者舊
日我侍者參得禪也蘇此所至推爲上首

聲聲小玉檀郎認著多應錯銀爭厭接相思曲紗窗日
落淚痕寂寞菖蒲葉作瀟湘綠

破竈墮

嵩嶽破竈墮和尚不稱名氏言行叵測隱居
嵩嶽山隅有廟甚靈殿中惟安一竈遠近祭
祀不輟烹宰物命甚多師一日領寺僧入廟
以杖敲竈三下曰咄此竈只是泥瓦合成聖
從何來靈從何起恁麼烹宰物命又打三下
竈乃傾破墮落須臾有一人青衣錢冠設拜
師前師曰是甚麼人曰我本此廟竈神久受
業報今日蒙師說無生法得脫此處生在天
中特來致謝師曰是汝本有之性非吾強言
神再禮而沒少選侍僧問曰某等久侍和尚
不蒙示誨竈神得甚麼徑旨便得生天師曰
我只向伊道是泥瓦合成別也無道理爲伊
侍僧無言師曰會麼僧曰不會師曰本有之
性爲甚麼不會侍僧等乃禮拜師曰破也破
墮也

銀河瀉透虛空壁鏗鏘敲斷秋風骨眞靈夜築冰華宮
殿腳齊堆補天石嵩山竈鬼無英魄塗毒未鳴先辟易

誰看太古新開闢夜叉老髮椶櫚碧

五通仙

世尊因五通僊人間世尊有六通我有五通
如何是那一通佛召五通僊人五通應諾佛
云那我一通
你問我

打瓦鼓撞泥鐘狼籍瞿曇那一通鼠膏不信善治聾雞
鳴天上犬吠雲中

捧鑪神

王太傳入昭慶煎茶時朗上座與明招把鉢
朗翻卻茶鉢太傳見問上座茶鉢下是什麼
朗云捧鑪神太傳云既是捧鑪神為什麼翻
卻茶鉢朗云仕官千日失在一朝太傳拂袖
便去明招云朗上座喫卻昭慶飯了卻去江
外打野樵朗云和尚作麼生招云非人得其
便雪竇云當時
但闍倒茶鉢

捧鑪神碧漢迢迢莫問津小遊誤入天羅巡南離朱鳥
鳴司晨騰蛇夭矯旋其身洞林卦氣著法新風天地火
三變屯誰蹋珊瑚火燄輪電埽五行開古春

飯袋子

襄州洞山守初宗慧禪師初參雲門門問近
離甚處師曰查渡門曰夏在甚處師曰湖南
報慈曰幾時離彼師曰八月二十五門曰放
汝三頓棒師不知過在甚處門曰飯袋子江
放三頓棒便恁麼去師於言下大悟遂曰他後
西湖南便恁麼去師於言下大悟遂曰他後
向無人煙處不蓄一粒米不種一莖菜接待
十方往來盡與伊抽釘拔楔拈卻炙脂帽子
脫卻鵲臭布衫教伊灑灑地作個無事衲僧
豈不快哉門曰你身如椰子大開得如許大
口師便禮拜

飯袋子無絃琴上誰排指江西湖南恁麼去楓落紅亭

暮山紫鵲臭布衫安足恃炙脂帽子輕拈耳此言不信如江水

洗鉢盂

僧問趙州學人乍入叢林乞師指示師云喫粥了也未云喫粥了也師云洗鉢盂去其僧因此大悟

招搖西指蔓菁布子日巡箕尾采萸采杞喫粥了洗鉢耳青天雲淨瓶水

汝水流

并州承天院三交智嵩禪師參首山問如何是佛法的大意山曰楚王城畔汝水東流師於此有省

楚王城畔汝水東流慈明水上挂鐙球額上無鬚死不

休幾時東海乾枯盡百丈蓬塵擁蜃樓

寫戲來

劉宜翁嘗參佛印頗自負一日見眞淨禪師便問長老寫戲來得幾年師曰專候樂官來曰我不入這保社師曰爭奈卽今在這場子裏劉擬議師拍手曰蝦蟇禪祇跳得一跳又坐次劉指禪衣曰喚作甚麼禪師曰禪衣曰如何是禪師乃抖擻不下劉無語師打一一下曰你伎倆如此敢勸老僧耶

新編院本唐堯始三千餘歲優場裏春風結束弄參軍
紅牙刻句排宮徵保社逃來無處所大石黃鍾祇者是
君休矣樂官補職緣誰起

南山茆

仰山慧寂通智禪師在鴻山爲直歲作務歸
鴻問甚麼處去來師曰田中來鴻曰田中多

少人師插鉞久手瀉日今日南
山大有入刈茅師拔鉞便行

算博士南斗七星心宿二點鬼簿茫茫古墓花無主插
鉞立蛟宮砥柱奔流急南山茆莫向梧桐覓鳳巢

輓繡球

僧問浮山和尚師唱誰家曲宗風嗣阿誰山
云八十翁翁輓繡球僧云恁麼則一句通然
開祖曹三玄戈甲振叢林
山云李陵元是漢朝臣

八十龍鍾輓繡球驚驚度曲上秦樓不見江南秋牧馬
悲笳霜月古揚州

靈樹碑

僧問靈樹知聖禪師如何是祖師西來意樹
默然遷化後門人立行狀碑欲入此語問師
曰先師默然處如何
何上碑師對曰師

靈樹遷化後門人議遺事先師默然處如何上碑記轉
令典冊中添載商量義

虛空鼓

鹽官謂眾曰虛空爲鼓須彌爲椎甚麼人打得眾無對有僧舉似南泉泉云王老師不打這破鼓笛

須彌槌虛空鼓打三更日卓午跨紫騮插白羽桃花谿
殺石虎躡葉腥紅吹黑雨秋海茫茫響樵斧

水盆劍

潭州石霜楚圓慈明禪師平生以事事無礙行心凡聖所不能測室中晏坐橫刀水盆之上旁置草屨使來參叩者下語無有契其機者

水一盆劍一口一綱草屨穿古柳拄杖橫安打蒼狗應

菴拔劍青蛟吼夜唱黃河水西走誰奠長星一杯酒

露柱餅

雲門問明教今日喫得幾個餠餅曰五個師
日露柱喫得幾個曰請和尚茶堂裏喫茶
白日琵琶作鬼語餠餅拈來分露柱山門廚庫飢歌回
帝釋中庭柘枝舞球打馬馬打球露柱困時風滿樓飢
餐餠餅一飽休煙透茶寮別樣愁

書梵字

趙州一日見僧來便面壁書梵字僧展坐具
禮三拜州轉身僧收坐具便行州云苦苦僧
撫掌呵
呵大笑

拈禿帚一丈六埽粉壁珠百斛畫卦臺前秋鬼哭結縛
谿風作書籠馬三蹶車一軸與人書不能讀寶鐸含風

響霜竹

望州亭

雪峰上堂諸上座望州亭與汝相見了也烏
石嶺與汝相見了也僧堂前與汝相見了也
保福展舉問鵝湖智字僧堂前相見卽且置
祇如望州亭烏石嶺甚麼處相見鵝湖驟步
歸方丈保福
低頭入僧堂

望州亭烏石嶺笑捉晴洲杏枝影弗於遶客彈箏篴十
洲老仙雲鬢整白玉樓傾散花冷赤虬版去秋魂醒

隔江招

襄州高亭簡禪師參德山隔江纔見便云不
審山乃搖扇招之師忽開悟乃橫趨而去便
不同
顧

東風翦綠春無迹溶漾漁帆半篙碧青山影裏摘楊花

笑擲千年舊桃核紅羅扇障神仙容黃鶴飛去花濛濛

弄師子

安吉州西余端師子始見弄師子發明心要
往見龍華受印可遂歸里中合綵爲師子皮
時被之因號端師子到華亭眾請上堂師陞
座曰靈山師子雲間哮吼佛法無可商量不
如打個筋斗便下座

弄師子虛空筋斗秋山舞哮吼能教霹靂藏齊州九點
飛青雨野干竄死狐狸無家獨行無伴安用爪牙漁歌
老逐瀟湘客南北東西踢浪花

鼇山雪

雪峰與巖頭至澧州鼇山店阻雪頭每日祇
是打睡師一向坐禪一日喚曰師兄師兄且
起來頭曰作甚麼師曰今生不著便共文逡
個漢行腳到處被他帶累今日到此又祇管

打睡頭喝曰噯眠去每日牀上坐恰似七村裏土地他時後日魔魅人家男女去在師自點宵曰我這裏未穩在不敢自諷頭曰我將謂你他日向孤峰頂上盤結草菴播揚大教猶作這個語話師曰我實未穩在頭曰你若實如此據你見處一我通來是處與你證明不是處與你刻卻師曰我初到鹽官見上堂舉色空義得個入處頭曰此去三十年切忌舉著又喜洞山過水偈曰切忌從他覓迢迢與我疏渠今正是我我今不是渠頭曰若與麼自救也未徹在師又曰後問德山從上宗乘中事學人還有分也無德山打一棒曰道甚麼我當時如桶底脫相似頭喝曰你不聞道從門入者不是家珍師曰他後如何卽是頭曰他後若欲播揚大教一一從自己胷襟流出將來與我蓋天蓋地去師於言下大悟便作禮起連聲叫曰師兄今日始是鰲山成道

鰲山雪鳥道無蹤
沉車轍相思不用瑤華折
休憶嚴寒人跡絕
玉塵萬斛誰提挈
君不聞至道無難
惟嫌揀擇

靈鍼熱刺虛空血

銀彈子

南泉謂座主曰你與我講經得麼主曰和尚爲某甲說禪某甲與和尚講經師曰不可將金彈子換銀彈子去

金彈子銀彈子馬蹏碎蹋桃花水東村小兒垂髮美斜
絡竹弓青柳裏泥丸擊落虛空齒笑殺王孫多比擬剪
波雙燕驚飛起

子湖牌

衢州子湖嚴利蹤禪師於門下立牌曰子湖有一隻狗上取人頭中取人心下取人足擬議卽喪身失命臨濟會下二僧來參方揭簾師喝曰看狗僧回顧師便歸方丈或有人問子湖狗師曰嗥嗥僧無語師便歸方丈

子湖牌上霹靂文寶書夜敕天將軍天狗吐火闔闔焚
羽林壘破虎豹分湘君折竹占靈氛劍截鱗角抽獅筋
通明鼓響攢紅雲

小脫空

應菴和尚示皖禪人法語云道既達卽無累
生之患是可得而名狀耶便能顯示七佛已
來威音那畔一個大脫空五祖謂一切妄言
綺語小脫空是也觀見本來面目大脫空是
也

小脫空釣絲紋斷鯉魚風大脫空經未翻譯只念人間
小脫空小脫空敲答臘石湖辛苦賣癡獸白日何如歌
踢踢

赤梢鯉

澧州洛浦山元安禪師卯歲出家通經論具
戒爲臨濟侍者濟嘗稱之曰此臨濟門下一
隻箭誰敢當鋒後辭臨濟濟曰臨濟門下
下有個赤梢鯉魚搖頭擺尾向南方去不知
向誰家賣賣裏淹殺師遊歷罷直往夾山卓
菴經年不訪夾山山乃修書令僧便打歸去
得便坐卻再展手索僧無對師便打曰歸去
舉似和尚僧回舉似山山曰這僧若開書三
內必來若和尚不開書斯人救不得也夾山卻
人伺師出菴便與燒卻越三日師果出菴來
人報曰菴中火起師亦不顧直到夾山不禮
拜乃當面叉手而立山曰雞棲鳳巢非其同
類出去師曰自遠趨風請師一接山曰住且
無閑黎此閒無老僧師便喝山曰住住且莫
草草恩恩雲月是同谿山各異截斷天下人
活頭卽不無閑黎爭教無舌人解語師仁思
山便打因茲服膺

赤梢鯉何事埋身齋甕死無舌人傳碧落書千金誰購
虛空紙腸斷一聲河滿子回首江山暮霞起

無底籃

雪竇明覺禪師因普請問僧甚處來云摘茶來師云人摘茶茶摘人不問你無底籃子重多少代云價得其便

無底籃兒聊賤賣價等河沙大千界不用家懸白澤圖
平消山海諸靈怪雲月谿山誰帶芥相傳款識西天派
樣子難教摩詰畫竹師近日曾襟隘只劈青筠編鹿寨
風旛動

六祖至廣州法性寺值印宗法師講涅槃經
寓止廊廡閒暮夜風颭剎幡聞二僧對論一
曰幡動一日風動往復不已祖曰不是
風動不是幡動仁者心動一眾竦然

不是旛不是風
蟪蛄眼裏擊金鐘不是風不是旛一片
征帆兩岸猿非旛動非風動梅花墮井泥牛痛風動非

旛動非柳絮悠揚信口吹

塗毒鼓

臨濟曰大凡演唱宗乘須一句中具三玄一
玄中具三要有一玄有要寂音尊者云余昔菴
於高安九峰之下有僧問余曰臨濟會中兩
僧一日相見同時下喝臨濟聞之陞座曰大
眾要會臨濟賓主句問取堂中二禪客僧便
問那個是賓那個是主臨濟曰賓主歷然余
方欲訓之頓是三玄三要之旨於是再拜曰
大哉無爲寂滅之幢也雖百千世有聞之者
儉心死盡況余去大師餘二百年哉作偈曰
一句中具三玄門一玄中具三要路細看即
是陷虎機忽轟一聲塗毒鼓儉心
死盡眼麻迷石女夢中毛卓豎

□□□□□頭顱葬無土亂翦齊州數十峰小摘□□
□□□持贈虛空擊鼓人梵天日日飛紅雨

白馬廟

京兆府蜺子和尙不知何許人也事跡頗異
居無定所自印心於洞山混俗闡川不畜道
具不循律儀冬夏惟披一衲逐日沿江岸采
掇蝦蜺以充其腹暮卽宿東山白馬廟紙錢
中居民目爲蜺子和尙華嚴靜禪師聞之欲
決真假先潛入紙錢中深夜師歸嚴把住曰
如何是祖師西來意師連答曰神前
酒臺盤嚴放手曰不虛與我同根生

豐草庵詩集十一卷文前集三卷後集三卷寶雲詩集
七卷明董說若雨撰若雨號西庵遐周先生子自稱鷓
鴒生南潯人明季諸生幼稟家學後出太倉張溥門精
研五經尤邃於易方言地志星經律法釋老之書靡不
鉤纂工古文詞江左名士爭相傾倒而姿稟孤特與俗
寡諧更國變棄諸生改姓名曰林蹇販靈巖僧繼起名
之曰元潛屏迹豐草庵其時志節之士有託而逃率以
南嶽和尚退翁爲依歸辛卯之難闔寺星散若雨獨負
篋杖策入山以從由是東南名宿益高其行丙申秋削
髮靈巖更名南潛字月涵主堯峰寶雲庵月涵所至之
地縉素宗仰於是海內無不推月涵爲禪門尊宿矣月

涵於傳鉢開堂飛錫住山之輩視若蔑如而身心融悟
得之典籍每一出遊則有書五十擔隨之雖僻谷之深
洪濤之險不暫離也其志豈在竺乾哉年六十七示寂
吳之夕香庵少未嘗作詩丙戌始爲詩以寫其空坑崖
海之音樂府出入漢魏文境亦清潔如其爲人有自序
七百餘言純是磊落不平之氣集刻於康熙二十九年
迄今二百餘年罕見流傳幸得此編刊以傳世歲在甲
寅吳興劉承幹跋